

錫金學校重興紀事卷上

電報

上端撫電 撫憲鈞鑒。米商匿捐罷市兩日。今晚聚衆二千餘至舍。劫掠索人。縱火房屋。危迫萬狀。速請鈞裁。電飭營縣。妥爲解散。不勝待命。楊模稟冬。七月初二晚十一點鐘發

錫紳致京都同鄉電 錫金會館公鑒。米棍吞捐。聚衆焚掠。勒令合城罷市。學堂毀盡。危急。

速電蘇撫。錫紳公電。初三日發

端撫致兩縣電 米行因學堂議加捐款。相率罷市。並毀壞學堂。燒毀楊紳模廳房。別行輕聽謠言。亦有閉門者。查此事楊紳辦事操切。所請加抽米捐。本部院並未批准。稟內亦無捐及別行之語。楊紳不洽輿情。本部院自當持平辦理。維聚衆罷市。律有明條。該行戶等萬不可妄聽訛傳。自生疑惑。仰即諭令一律開市。弗得遲延。致干罪戾。果能即刻開門。尙可從寬免究。倘再抗違。定將爲首鬧事之人。嚴拏重辦。以上云云。即刻繕錄多張。遍貼衢市。曉諭。該令兩電均悉。境內教堂。必須如意密爲保護。要緊要緊。撫院江。

錫金學堂致同鄉京官電 學堂議撥提米行廟捐。並未另加。米董造謠。各業皆捐。致激衆

怒。煽動匪類。逼迫罷市。初二晚掠楊宅。初三日毀竣實東林學堂淨盡。晚復焚盡楊宅。兩令模稜粉飾。朦稟上憲。乞會同鄉面稟管學。電致端撫。速商辦法。支

兩縣稟蘇撫電。撫藩臬臺鑒。米業罷市一案。本日已一律開市。地方安謐如常。特先稟聞。

再初三日酉刻楊模被焚住宅。餘火因風復燃。延燒房屋兩進。立即救息。查無縱火滋鬧情事。詳細情形。另行具稟。卑職詒鳴鳳稟。頃奉江電。兩縣各行已一律開市。業經電陳。教堂亦保護平安。堪慰憲廑。除遵飭照繕電示曉諭外。詳細情形。查明另稟。卑職詒鳴鳳支

蘇撫飭兩縣電。此案楊模等赴學院稟加米捐。批由該令提集趙夔等澈究。事關加捐。並未據該令將辦理情形具稟錄報。此次米行罷市。縣中先既聞有謠言。不能預爲布置。彈壓解散。已屬罷軟無能。目前又不能迅速辦妥。安坐衙齋。視若無睹。尤爲可恨。現已飭委王令念祖馳往。會同妥速查辦。總之罷市滋鬧。大千例禁。楊模等稟加米捐一事。該米行左右爲難情形。亦應據實來省稟訴。乃並無一字呈報。輒敢妄聽謠言。聚衆罷市。實屬藐法已極。向來此等案件。無不由於匪徒造謠唆使。希圖搶掠漁利。迨至禍已釀成。匪徒已遠颺。無知貿易之人。反干法紀。其情不無可矜。該令等與王令向各米行切實開導。令其迅速一律開市。

一面密拿造謠匪徒。及爲首滋事之人。嚴訊稟辦。至開導之法。須督同公正商董。及地方素所敬服之人。分投諭告。亦非一紙示諭。所能了事。惟愚民固屬堪憐。刁風亦不可長。該令務善體此意。安速辦理。倘再措置乖方。或仍坐視不理。定將該令予以重譴。務即會同王令。飛速電聞。撫院支

端撫復同鄉京官電。戶部廉軍機楊商部唐兵部王商部楊戶部唐鑒。支電悉。貴邑米棍聚衆鬧事。已派員往彈壓。現在業經開市。城內安堵。當一面查拿首要。一面料理捐款。務求持平辦理。祈勿念。又公呈請將公車賓興款項改派學堂出洋。極是正辦。容批縣料理。地方欸項。任其虛糜坐耗。學堂轉不能提用。鄙意甚不謂然。正當切細清查提撥。恢張學界。以慰諸君子之望。方歌。

致京部學務處王書衡。轉呈張尙書鑒。無錫米業吞捐抗查罷市。挾匪燒搶。各學堂均毀。求速電端帥嚴辦。巨扶學界。張鶴齡楊模道霖魚。

覆無錫各學堂。無錫學堂公鑒。已稟管學電端撫。端前來覆電。拿首要。整捐項。意同。廉。七月初九晚自北京來電

張管學二電 蘇州端撫台鑒。閱致無錫京官歌電。知己查拏首要。料理捐款。極佩蓋簪。興學困難。望壹意匡扶。以善其後。熙尤。

上海南洋公學轉張篠園觀察鑒。書衡交蘇州魚電閱悉。已電致午帥矣。望轉告範夫昆仲。熙尤。

蘇撫覆管學大臣電 尤電敬悉。錫金米行罷市一案。由於官紳商全不接洽。致釀此事。現已派許守星壁王令念祖前往查辦。鄙意先將首要嚴拿痛懲。學堂捐款。亦須澈底清查。惟緩急操縱之間。不能不因時制宜耳。兩學堂已責成兩縣賠修。不准有誤學生講肄之期。俟有眉目。即當奏明辦理。愚莠未化。深自愧悚。仍求隨時匡救爲幸。方元。